

Trí scéal nuachta

Ceist 1 Beidh tú ag féachaint ar ball ar thuairisc faoi thrí scéal dhifriúla. Sula bhféachann tú ar an mír, pléigh na ceistanna seo leis an duine in aice leat.

- i. Ar chuala tú faoin timpiste bhóthair ba mheasa i stair an stáit?
- ii. Cén Ghaeilge atá ar an DUP (*Democratic Unionist Party*). Tabhair buille faoi thuairim mura bhfuil tú cinnte.
- iii. An nglacann a lán polaiteoirí breabanna sa lá atá inniu ann, dar leat?

Ceist 2 Cén Ghaeilge atá ar na focail/frásaí seo thíos? Beidh siad le cloisteáil sa mhír ar ball.

- was charged
- 4 years suspended
- the Court of Appeal
- he pleaded guilty
- dangerous driving
- leadership of the party
- Assembly
- MP
- that will succeed Peter Robinson
- lobby
- recording
- Investigations Unit

Féach ar an mír den chéad uair le feiceáil an raibh an ceart agat.

Ceist 3 Anois, féach ar an tuairisc arís agus scríobh achoimre ghearr ar na trí scéal.

Scéal 1

Scéal 2

Scéal 3

Cad a bhí ag an duine in aice leat?

Ceist 4 ‘...ar fionraí...’ ach ‘...ar bhóthar...’

1. Bí ag obair leis an duine in aice leat agus mínigí cén fáth a bhfuil séimhiú ar ‘bóthar’ ach nach bhfuil ar ‘fionraí’?
2. Anois déanaigí iarracht na cinn seo a dhéanamh:

ar (ball)	_____
ar (deireadh)	_____
ar (cat)	_____
ar (meisce)	_____
ar (Peadar)	_____
ar (díol)	_____
ar (ceal)	_____
ar (tosach)	_____
ar (tosach) an tslua	_____
ar (foirgneamh)	_____

Ceist 5 ‘...ochtar...’ agus ‘...triúr polaiteoirí...’

Na huimhreacha pearsanta a thugtar ar na huimhreacha a úsáidtear chun daoine a chomhaireamh.

Líon na bearnaí leis an uimhir phearsanta chuí:

1. duine amháin
2. beirt
3. _____
4. _____
5. _____
6. _____
7. _____
8. _____
9. _____
10. _____

Líon na bearnaí sa bhosca leis an bhfoirm cheart de gach ainmfhocal, chun na rialacha a bhaineann leis na huimhreacha pearsanta a chur in iúl. Tá sampla amháin déanta.

	_____ amháin	beirt	triúr-deichniúr
múinteoir	<i>múinteoir amháin</i>	<i>beirt mhúinteoirí</i>	<i>triúr múinteoirí</i>
mac			
iníon			
deirfiúr			
páiste			

Ceist 6 Cuir na focail agus na frásaí in abairtí lena mbrí a mhíniú:

- mar gheall ar
- ciontach
- mar thoradh ar
- éirigh as
- as ucht

Treoracha agus Freagraí

Ceist 1

Is féidir gach beirt a chur ag plé na gceisteanna seo sula seinntear an tuairisc, nó iad a chur ag obair i ngrúpaí de thriúr nó de cheathrar.

(DUP – an Páirtí Aontachtach Daonlathach)

Ceist 2

Is féidir an stór focal seo a phlé tar éis féachaint amháin.

- was charged – *gearradh ... ar*
- 4 years suspended – *ceithre bliana ar fionraí*
- the Court of Appeal – *an Chúirt Achomhairc*
- he pleaded guilty – *phléadáil sé ciontach*
- dangerous driving – *tiomáint chontúirteach*
- leadership of the party – *ceannaireacht an Pháirtí*
- Assembly – *Comhthionól*
- MP – *Feisire*
- that will succeed Peter Robinson – *a thiocfaidh i gcomharbacht ar P. Robinson*
- lobby – *stocaireacht*
- recording – *taifeadadh*
- Investigations Unit – *Aonad Fiosrúcháin*

Ceist 3

Féach an script.

Ceist 4

- ✓ Leanann séimhiú **ar** nuair atá suíomh nó ionad áirithe i gceist:
ar Chaitlín, ar thábla, ar bhóthar
- ✓ Ní leanann séimhiú **ar** nuair a chuirtear staid nó coinníoll in iúl:
ar buile, ar fionraí
- ✓ Ní leanann séimhiú **ar** nuair atá ionad ginearálta i gceist:
ar muir, ar bord
- ✓ Ní leanann séimhiú **ar** nuair atá am i gceist:
ar maidin

ar (ball)	<i>ar ball</i>
ar (deireadh)	<i>ar deireadh</i>
ar (cat)	<i>ar chat</i>
ar (meisce)	<i>ar meisce</i>
ar (Peadar)	<i>ar Pheadar</i>
ar (díol)	<i>ar díol</i>
ar (ceal)	<i>ar ceal</i>
ar (tosach)	<i>ar tosach</i>
ar (tosach) an tslua	<i>ar thosach an tslua</i>
ar (foirgneamh)	<i>ar fhoirgneamh</i>

Ceist 5

1. duine amháin
2. beirt
3. triúr
4. ceathrar
5. cúigear
6. seisear
7. seachtar
8. ochtar

9. naonúr
10. deichniúr

	<u> </u> amháin	beirt	triúr-deichniúr
múinteoir	<i>múinteoir amháin</i>	<i>beirt mhúinteoirí</i>	<i>triúr múinteoirí</i>
mac	<i>mac amháin</i>	<i>beirt mhac</i>	<i>ceathrar mac</i>
iníon	<i>iníon amháin</i>	<i>beirt iníonacha</i>	<i>naonúr iníonacha</i>
deirfiúr	<i>deirfiúr amháin</i>	<i>beirt deirfiúracha</i>	<i>seisear deirfiúracha</i>
páiste	<i>páiste amháin</i>	<i>beirt pháistí</i>	<i>ochtar páistí</i>

Baintear úsáid as an tuiséal ginideach iolra den ainmfhocal tar éis na n-uimhreacha pearsanta. Séimhítear an t-ainmfhocal tar éis ‘beirt’ ach amháin má thosaíonn an t-ainmfhocal le **d**, **t** nó **s**.

Ceist 6

Pléigh na habairtí a bhí ag na foghlaimeoirí.

- mar gheall ar – *about*
- ciontach – *guilty*
- mar thoradh ar – *as a result of*
- éirigh as – *retire, give up*
- as ucht – *for the sake of, in return for*

Eimear Ní Chonaola

Scéal 1

Gearradh pionós nua, ocht mbliana príosúin, ceithre bliana ar fionraí, ar Shaun Kelly atá seacht mbliana is fiche mar gheall ar an timpiste bhóthair ba mheasa a tharla sa tír seo ó bunaíodh an stát. Rialaigh an Chúirt Achomhairc go raibh an chéad phionós a gearradh air róbhog.

Maraíodh ochtar ar fad sa timpiste i mí Iúil 2010, i gContae Dhún na nGall. Phléadáil Shaun Kelly ciontach i dtiomáint chontúirteach a raibh bas ochtar mar thoradh air, ar bhóthar idir Cluain Maine agus Bun Cranncha.

Scéal 2

D'fhógair Nigel Dodds ón DUP tráthnóna nach mbeadh sé ag cur a ainm chun cinn do cheannaireacht an Pháirtí nuair a éireoidh Peter Robinson as go hoifigiúil, ag tús na bliana seo chugainn. D'éirigh Nigel Dodds as Comhthionól Stormont cúig bliana ó shin. Is Feisire i bParlaimint Westminster é i gcónaí, ach dúirt sé tráthnóna nár chreid sé go bhféadfadh sé a bheith i gceannas ar an DUP mura raibh sé i Stormont. Meastar anois gurb í Arlene Foster, an tAire Airgeadais i Stormont, a thioctas¹ i gcomharbacht ar Peter Robinson.

Scéal 3

Thairg triúr polaiteoirí stocaireacht a dhéanamh ar son comhlacht mulite gaoithe ach buntáiste éigint² a bheith ann dóibh féin. D'iarr na polaiteoirí airgead nó iasacht nó geallúint³ ar infheistíocht as ucht stocaireacht a dhéanamh.

Deineadh⁴ taifeadadh ar na polaiteoirí go rúnda mar chuid de chlár teilifíse atá déanta ag aonad fiosrúcháin RTÉ, a chraolfar anocht.

¹ *a thioctaidh* an leagan caighdeánach de réir an CO (1958); tugtar aitheantas don leagan *a thioctas* sa COA (2012)

² *éigin* an leagan caighdeánach

³ *gealltanais* an leagan caighdeánach

⁴ *rinneadh* an leagan caighdeánach de réir an CO (1958); tugtar aitheantas don leagan *deineadh* sa COA (2012)